


Enternasyona Sosyalîst rojên 29 û 30'ê Hezîrana 2007'an, bi beşdariya gellek kesayetiyên siyasî û nûnerên partiyên endam yê û rêxistina navneteweyî li welatê Swîsê cîviya.

Şandeke PDK Îranê bi serokatiya Dr. Xusro Ebdulahi di wê civînê de beşdarî kir.

Birêz Celal Talebanî, Serok Komarê Îraqê û Birêz Mesûd Barzanî jî tevî civîna ES'ê bûn û axivîn...



Kirîza Benzînê, Starta Dorpêçên Aborî

Civîna Opozîsyona Îranê Li Parîsê...



Wezareta Petrolê ya Îranê çend rojan berî niha bîyarek eşkere kir ku ji bo Benzînê sînor diyarî kirine. Her li ser wê bîyara Wezaretê li gellek bajarên Îranê û bi taybet li



Bangewaz Ji Bo Beşdarî Di Rû û Resma Bibîranîna Dr. Qasimlo Li Pirlaşizê



bajarên Kurdakincî de alozî û xwenîşandan çê bûne û xelkê nerazî erîş benzînxaneyan kirine ku di encam de pêtir ji 20 benzînxane şewitandine. Herwha li dijî rejîma Îranê û Serok Komarê Îranê jî dirûşm avêtine. Hêzên Rejîma Komara Îslamî jî wekî pişeya xwe ya her car, erîş kirine ser xelkê û teqe ji wan kirin ku hêj nediyar e ku radeya kuştî û birîndaran çend kes in û çend kes jî hatine girtin û binçavkirin.

Li gor bîyara Wezaretê li Îranê kesê/a ku otumbêla wî/ê ya taybet hebe, dikare mehane 100 lîtr Benzînê bistîne. Tirimbêlên Taksî jî ku rojane dixebitin, dikarin mehane 800 lîtr Benzînê bistînin. Herwaha Tirimbêlên ku nivroj dixebitin, dikarin mehane 600 lîtr bistînin. Li gorî bîyarek otumbêlên fermî jî mehane 300 lîtr par hene, wekî dinê dikarin 4 qatan biha û giran bikirrin.

Bîyara han li demekê de hatiye dayîn ku Îran li cîhanê de herî zêde Benzînê difroşe û duyemîn welat di hinartina niştê de ye. Lê ji ber ku palavgeyên wê kêmtir in, %40 Benzîna xwe ji derve tîne.

Îranê jî bo îsal 2/5 mîlyar dolar budce ji bo standina Benzînê veqetandibû, di halekê de ku par ev hejmare 5 mîlyar dolar bû.

Çend rojek e ku kêmbûna benzînê yê bûye kirzî û pirsgirêkek mezin li hemû bajarên Îranê û xelk li hember wê bîyara rejîmê bi xurtî nerazî ye. Ev rewşê jî ber baykot û dorpêçên aborî yê ser Îranê yê li dor destbernedan ji dewlemendkirina Uraniyûmê ye û dijberîkirin bi raya giştî ya navneteweyî re ye.

Mafên Hewelatîbûnê



Tawanbarên Enfalê Gihîştin Cezayê Xwe

Dadgeha Bilind a Tawanana ya Îraqê, li 24.06.2007'an de, piştî çend rûniştinan bîyara darvekirina **Elî Hesen El Mecîd (Elî Kîmyayî), Sultan Haşim û Husên Tikrîtî** der kir. Her wiha Sabir El Dorî û Ferhan Mutleg bi hepsa heta hetayî û Tahir Elan jî ji ber nebûna belgeyên hewce, serbest hate berdan.

Elî Kîmyayî û hevalên wî li Prosesa Enfalê û bikaranîna hemû cure çek û silahan li dijî gelê Kurdistanê beşdar bûne û di cîbicîkirina siyasetên rejîma Bees'ê û Sedamê dîktator û jînosaydkirina gelê



Kurdistanê de gellek ektîv bûne. Herwiha dadgeha han bîyara qerebûkirina goriyên Enfalê jî der kir.

ZANÎN Û PERWERDEHÎ



Çend Gotin Derheq Muzîka Kurmancî Li Kurdistanê Îranê



Kîmiyabarana Bajarê Serdeştê Piştî 20 Salan

Salekê beriya ku rejîma Bees a Îraqê ya berê bixwaze bajarê Helebçeyê bi bombeyên Kîmyayî bimirîne û cineyeteke mezin di dîroka reş û biyom a xwe de tomar bike, roja 28.06.1987'an, seet 16.30'ê êvarê bajarê Serdeştê li Kurdistanê Îranê da ber erîşa bombeyê Kîmyayî. Di encama wê kiriyara dijî mirovan de rejîma Bees ya Îraqê, 7 bombeyên 550 kiloyî yê gaza Kîmyayî a xerdelê barandin ser bajarê 20000 kesî yê wê demê yê Serdeştê û bêtirî 100 kes di cî de kuştin û zêdetirî 12 000 kes jî bi xurtî birîndar bûn.



Îsal 20'emîn salvegera tal û nexweş ya wê cinayeta hov e. Hêj bandorên xirab û neyînî yê wê bomebaranê li ser jiyana û tendurustiya xelkê vî bajarî tê dîtin. Niha jî di salê de dehan kes jî vî bajarî jî ber bandora çekên Kîmyayî jiyana xwe ji dest

didin û nexweşên zaf jî hene û piraniya wan jî xizmetên derman kirinê bêpar in.

2

2

8

9

10

PDK Îranê Bi Fermî Ji Civîna Opozîsyona Îranê Re Li Parîsê Hate Gazîkirin

Rapor: **Rehîm Reşîdî**
Wergeran: **Omîd Esxeran**

Di bin vavê **civîna hevpêwendiya Îranê** de, dejmêr 9:45 deqîqeyên sibêdeya roja îne, 25.03.1386(5.06.2007)an, beşek ji hêzên dijber ên Komara Îslamî ya Îranê, li bajarê Parîsê lihev civiyan.

Di vê civînê de ku 3 rojan dom hebû, pitir ji 80 kes beşdar bûn. Kongireya Neteweyên Îrana Federal, PDK Îranê, Komeleya Zehmetkêşên Şoerşgir ên Kurdistanê, Partiya Demokratîk a Gel a Îranê û hin kesayetiyan siyasî yê opozîsyona Îranê ku weke xwe û ne weke nûnerên rêxistin yan tevgera siyasî beşdarî civîna han bibûn, gotarên xwe pêşkêş kirin.

Pêkînerên vê civînê piranî berê ser bi tevgera "Seltentexwah"(alîgirên Paşatiyê) di Îranê de bûn ku niha guhertin bi ser bîr û rayê wan de hatiye û bi ser vê baweriyê ne ku divêt sîstema desthilatê di Îranê de ji aliyê xelkê ve û di hilbijartineke azad û demokratîk de were hilbijartin.

Di rastî de armanc ji civîna vê carê eva bû ku bi beşdariya aliyên din, nemaze Kongireya Neteweyên Îrana Federal û

partiyên Kurdî, bigihgjin pilatformeke cihê baweriyê û di vê rêyê de ji xwe re heqaniyetê bidest bixin, lê ji ber ku geleleyekî dewlemend di vî warî de nebû, nekarin tu serkevtinekê bidest bixin. Hêjayî gotinê ye ku di vê civînê de nûnerê PDKÎranê li derveyî welat, gotara yekemîn pêşkêş kir, wî kêfxweşiya xwe li ser gazîkirina bi fermî ya nûnerê Kongireya Neteweyên Îrana Federal ji bo vê civînê derbirî û li ser bisetveanîna mafên neteweyî yê neteweyên Îranê bi cidî tekez kir. Piştê nûnerê Komeleya Zehmetkêşên Şoerşgir a Kurdistanê, axivî û dîre dor gihîştê pêşkêşkirina gotara Kongireya Neteweyên Îrana Federal ku tê de li ser federalîzekirina pêşeroja Îranê tekez hatibû kirin. Gotera vê kongireyê hemû basên civîna han xistine bin bandora xwe û piraniya beşdaran bi erênî bîr û ra li ser



YCDK Îranê Daxwazê Ji Ciwanan Dike Ku Beşdarî Rê û Resma Sala 2007'an Ya Bibîranîna Dr. Qasimlo Li Pirlaşizê Bibin

Bangewaz:

Ji bo hemû endam û alîgirên YCDK Îranê li Danîmarkê


Ciwanên ezîz û birûmet!

Şoreşvanên rêya Dr. Qasimlo!

Bi boneya 18'emîn salvegera terorkirina Dr. Qasimlo û hevalên wî li Otrîşê, Yekîtiya Ciwanên Demokrat yê Kurdistanê Îranê li Danîmarkê amadekariyên seredaneke bo Goristana Pirlaşizê(li Parîsê) di 13.07.2007'an de dike.

Merem ji vê seredane nûkirina peymanê bi Dr. Qasimloyê nemir û sozdana bi wî û hevalên wî re ye ku hêj li çepera şoreş, xebat û berwedane de mane û dê heta dawîn dilopa xwîna xwe jî rêvingên rêya wî bi rêberiya PDK Îranê bibin.

Lewre em daxwazê ji hemû endam û alîgirên ezîz dikin ku beşdarê wê seredane bibin.



**Ji bo zaniyariyên zêde têkiliyê bi vî navnişanê jêrin bigrin:
E - Mail: info@lawan.dk**

diguherîn.

Bandora gotara KNÎF'ê bi qasekê bû ku pêkhîner û birêveberên vê civînê bi fermî daxwaz ji birêz Şaho Hisênî, nûnerê PDK Îranê kirin ku bi merema dîtina rêçareyekê ji bo çareserkirina pirsgerêka neteweyî di Îranê de civîneke taybetî lidar bixin. Nûnerê PDK Îranê tevî pêşwazîkirinê ji vê daxwazê, da zanîn ku bi bê beşdarbûna nûnerê KNÎF û Komeleya Şorigêrên Zehmetkêş ên Kurdistanê Îranê beşdariyê di tu civîneke taybetî û daxistê de nake. Di encamê de birêz Hemze Bayezîdî, bi nûneriya KNÎF'ê, Şaho Husênî, Dr. Mîro Eliyar, Ebdulriza Kerîmî bi nûneriya PDK Îranê, Nahîd Behmenî û Zagros Xusrewî bi nûneriya Komeleya Şoreşgerên Zehmetkêş ên Kurdistanê Îranê, Kambîz Rosta û Şehriyar Ahî û Maşala Selîmî ji aliyê beranber beşdarî vê civînê bûn.

Di vê civîna taybetî de tevî arastekirina rexneyan ji nêrîna pawanxwazane a hêzên seranserî û civîna Parîsê li derheq nebûna helwesta ron û jêhatî derheq çareserkirina pirsgerêka neteweyî di Îranê de, li ser domandina gotûbêj û danûstandinan tekez hate kirin.

Hewce ye were gotinê ku bi merema dîtina rêçareyekê ji bo çareserkirina pirsgerêka neteweyî di Îranê de ku ciyê pesenda hemû aliyekê be, biryar hate girtin ku komîsyonek were pêk anîn ku hetanî 3 mehan gelaleyekê bo vê meremê amade bike, piştê ev gelaleyê ji aliyê civata rêberiya hilbijartî a civîna Parîsê ve ku 15 kes in, were pesendkirin. Pêwîst e ku were gotin Ziya Sedroleşrafî ji KNÎF'ê, Ebdulriza Kerîmî ji aliyê PDK Îranê, Nahîd Behmenî ji Komeleya Şoreşger, Kambîz Rosta û Şehriyar Ahî bi nûneriya civîna Parîsê, endamên komîsyona navhatî ne. Hêjayî gotinê ye ku KNÎF'ê, tevî PDK Îranê û Komeleya Şoreşger ên Kurdistanê Îranê dane zanîn ku hetanî lihevkerina bê girêpiçk a rêberiya Civîna Parîsê li derheq çawanîya rêçareya pirsgerêka neteweyî di Îranê de, naçin nava tu hevalbendiyekê, lewra xwe ji berbijkirinê ji bo beşdarbûn di civata rêberiyê de parastin.

Hewce ye bihê gotin ku xala herî berçav a vê rûniştinê di vê çendê de bû ku KNÎF biwêrane li ser federalîzekirina Îrana pêşerojê bîrsar bû û helwest û nêrînen wê girîng û ciyê baldanê hatin hesibandin.

Xala qels a vê civînê eva bû ku hewl di hate dan ku kesayeti û rêxistin di hilbijartina civata rêberiyê de xwe diyê yek deng bin, vê mijarê ji aliyê nûnerê Kongirê, PDK Îranê û Komeleya Şoreşger ve dengê nerênî wergirt. Lê hinek ji taqiman her bona vê çendê ku navê wan di nava navan de be, bi bê guhdan bi zîrarên vî karî, hevdem bi bê hebûna helwest û bernamaya jêhatî ji aliyê Civîna Parîsê ve ji bo çareserkirina pirsgerêka neteweyî di Îrana piştî Komara Îslamî de, li cihê derbirîna helwestê, siyaseta hevahengbûn û xwe rêxistinê tevî birêveberên civîna Parîsê girtin pêşiya xwe, bêyê vî hindê ku bikarin fermibûnê ji xwe re bidestve binin, ev inde jî nîşaniya vî rastiye ye ku ev taqime ji hemû aliyekê ve xewle bûye.

Derdê Gelên Îranê Azadî û Demokrasî Ye An Kuştina Selman Ruşdî?

Sehab Xalidî

Pîştî vê ku çend rojan berî niha Meleka Bîrîtaniyayê nîşana "Şiwaliye" da Selman Ruşdî,

nivîskarê navdar yê pirtûka "Ayetên Şeytanî", berpîrsiyarên dewleta Îran, Pakistanê û hinek ji pêkhatiyên olî di welatên Îslamî de derheq vê pîrsê nerazîbûna xwe eyan kirin.

Selman Ruşdî di 19.06.1947'an, ji malbateke Misilmanan di bajarê Bembê ya Hindistanê de ji dayîk bû, bavê wî parêzer û diya wî jî mamostayê xwendegehê bû.

Pîştî koçberbûna malbata wî bo derveyî welat, wî xwendina xwe li xwendegeha Kîngz Kalic a Londonê de domand û piştî wê li zanîngeha Kîmbîrîç di koleja dîrokê de xwendina xwe domand.

Wî yekemîn romana xwe di sala 1975'an de nivîsand. Şeş salan piştî wê, Selman Ruşdî karî romana xwe ya duyemîn li jêr navê "Zarokên Nîva Şevê" bi dawî bîne. Vê romanê bo cara yekemîn navê wî derxist. Wî di sala 1987'an de karî ku xelata bi navê "Bukir" wergire.

Selman Ruşdî di sala 1988'an de pirtûka "Ayetên Şeytanî" da weşandin ku yek ji romanên herî naskirî ên cîhanê ye.

Ev pirtûka cara yekemîn li welatê Hindistanê, di ciyê ji dayîkbûna vî nivîskarî de hate qedexekirin û her di heman mehê de, ew pirtûk li Pakistanê û li Afrîqaya Başûr de jî hate nava refa wan pirtûkên qedexekirî. Piştî çend heftayan ew pirtûk li piraniya welatên Îslamî de jî hate qedexekirin.

Di meha Şibata sala 1989'an de, li meşeke pan û berfireh a nerazîbûnê di Îslam Abada Pakistanê li dijî Selman Ruşdî û pirtûka wî de, şeş kes hatne kuştin.


Çend mehan piştî weşandina pirtûka "Ayetên Şeytanî", Xumêynî rêberê pêşîn ê Hikûmeta Îslamî a Îranê di rêkêta 25.11.1367 (14.02.1988)an biryara zibarê (fitwayê) li dijî Selman Ruşdî derkir, ku deqê hukmê wî bi vî awayî bû: *Ez gişt Misilmanên gernas yên seraserê cîhanê aqehdar dikim ku nivîskarê pirtûka "Ayetên Şeytanî" ku pirtûka wî li dijî Îslam, Pêxember û Quranê hatiye çap û weşandin, her wiha ew kesên ku dest di weşandina vê pirtûkê de hene, bi îdamê têne mehkûmkirin."*

Her wiha Xumêynî di vî hukmî de tekez kiribû ku: *"Ez ji Misilmanên xwedî*

xîret dixwazim ku heke li her derekê evne dîtin, bilez wan îdam bikin, da ku êdî kes curetê neke ku bêhurmetiyê bi sînoren pîroz (muqedesatên)ên Misilmanan bike, û her kesê/a di vê rêyê de bihê kuştin, şehîd e, heke Xwedê bixwaze"

Bîrîtaniyayê li 07.03.1989'an de têkiliyên xwe ên dîplomatkî bi Îranê re qut kirin.

Piştî derkirina vê fitwayê, Binyata 15'ê Xurdad (18'ê Cozerdan)ê hinek xelat ji bo wan kesana ku bikarin vê fitwayê bi kiryan birêve bibin, diyarî kir û piştî wê ev xelat zêde kirin ku di dawiyê



de gihîştê 2.8 milyon dolarî.

Herwiha heftiya rabihurî nûçegihaniya "Fars" ragihand ku girûpekkê li jêr navê "Navenda Rêzgirtina Ji Şehîdên Serhildana Cîhana Îslamê" xeleteke 150 hezar dolarî bo rêveberê hukmê îdama Selman Ruşdî diyarî kiriye.

Vê navendê di sala 2004(1383)an de, xelata 100 hezar dolarî bo rêveberên vê hukmî diyarî kiribû, ku piştî bexşîna nîşana "Şiwaliye" bi vî nivîskarî, ew xelat kirne 150 hezar dolar.

Îranê li sala 1998'an, di çarçoveya lihevhatinekê tevî Bîrîtaniyayê, ev fitwa hilweşand, lê Melayên tundrew her niha jî dibêjin ev fitwaya di ciyê xwe de ye û divê rêve here.

Ruşdî yek ji wan 950 kesa ye ku evsal bi boneya cejna jidayîkbûna Meleka Bîrîtaniyayê naznav bi wan hatne bexşîn.

Selman Ruşdî di sala 1990'an de di daxuyaniyekê de daxwaza lêborînê ji Misilmanan kir, lê piştî heyamekê, di hevpeyvînekê de ev lêborîn bi şaşiya herî mezin a di jiyana xwe de zanî.

Wî çaxî ku Xumêynî ew fitwa derkir, taze şerê Îran û Îraqê bi dawî hatibû û Xumêynî biryarnamêya 598'ê ya KONSEYA Ewlekariyê qebûl kiribû û Xumêynî ku wî

çaxî diruşma *"Şer şer heta serkevtinê"* dida, yan diruşma ji *"Rizgariya Qudsê rêya Kerbelayê ve"* dida, lê negihîste çî yek ji wan armancên xwe yên qirêj û gemar, lewma dîsan dixwast ku navê wî bikeve ser zar û zimanan, li ser radyo û televîzyonan.

Ewa bû ku ya Xumêynî dixwast Xwedê jê re şand. Selman Ruşdî roman nivîsand û Xumêynî nûçeyek bihîst ku dibêjin pirtûka Selman Ruşdî li dijî Îslamê ye, lewra baştirîn derfet bû ku Xumêynî ji xwe re piropagendeyan bike.

Lê eva çend meh bi ser vê meselê re derbas bibû, lê Xumêynî taze ev nûçeyê bihîstibû! Dewleta Erebestana Seûdî bi fermî li dijî nivîskarê vê pirtûkê doz vekiribû û rexne li Bîrîtaniyayê girtibû ku çawan wan îzna belavbûna vê pirtûkê daye? Xumêynî jî vê yekê ditirsîya ku heke ji karwan bi cî bimîne, dê rêberiya cîhana Îslamê ji dest bide, û taze direng jî bû, lewra "Alê Siûd" rêberiya tevgera rexnegirane li dijî vê pirtûkê bi dest ve girtibû. Xumêynî ku daxwaza rêberiya cîhana Îslamê dikir, ditirsîya ku ew rêberiya ji dest de derbikeve.

Di rastî de, Xumêynî bê vê yekê ku bizane çî di nava vê pirtûkê de ye, nivîskarê vê pirtûkê bi kafir û "Murted" binav kiribû.

Bi vî awayî bû ku serkomarê wî çaxî jî, roja 15.03.1989'an wekî derfeta dawî ji bo kuştina Selman Ruşdî danîn û xatircem bûn ku berî vê rêkêvtê Misilman yê wî kafirî (helbet bi qewlê desthilatdarên rejîmê) bikujin.

Di rastî de, Selman Ruşdî li jêr çetra azadiya çapemeniyên de bû ku ew pirtûka romanê nivîsandibû, lê heke em wisa danên ku karê wî mifaha şaş ji azadiya nivîsandin û çapemeniya be, lê fitwaya Xumêynî destdirêjî bû bo ser mafê hakimiyeta welatekê û bînpêkirina yasa û pîrensîpên navnetewî û kareke dûr ji aqil û mentiqê bûye.

Herwiha ew hemû piropagendeyên Xumêynî bûne sebebê pitir navdarbûna Selman Ruşdî û pirtûka wî. Desthilatdarên rejîmê niha jî bas ji vê fitwayê dikin û dibêjin ev fitwa divêt birêve here.

Desthilatdarên rejîmê her carê dixwazin ku gelên Îranê bi pîsekê ve mijûl bikin û bi vî awayî bigihîjne armancên xwe yên gemar. Lê neteweyên hişyar ên Îranê qet serê xwe bi van pîrsan ve mijûl nakin. Gelên Îranê bi bêy çî duiliyekê li pey azadî û demokrasîyê ne. Azadî û demokrasî dikare derdê neteweyên bindest ên Îranê derman bike, ne kuştina Selman Ruşdî.

Çavkai:
Malpera BBC"
Malpera Radio Farda"
Rojnameya "Kurdistan", hejmar 158

Di Bîranîna Çar Efserên Şehîd Yên 19'ê Hezîrana 1947'an Ya Zayînî

Rehîm Reşîdî
W: Gulnam

Her wek em dizanin 29'ê Cozerdanê (19'ê Hezîranê), salvegera lidarvekirina çar

Efserên Kurd yê welatparêz, di sala 1947'an ya Zayînî de, bi destê karbidestên dijî Kurd yê rejîma Paşatî ya Îraqê ye.

Serheng **Mistefa Xoşnav**, serheng **Ezet Ebdulezîz**, Serwan **Mihemed Mehmûd Qudsî** û serheng **Xeyrola Ebdulkerîm**, ew çar Efserên Arteşa Îraqê bûn ku di dema berxwedana Kurdên başûr bi rêberiya nemir Mela Mistefa Barzanî, dest ji xizmet bi hêza dagirker berdan û bi awayekî çeleng di şoreşa Kurdistanê de beşdarî kirin.

Rohn û eşkere ye piştî damezrandina Komara Kurdistanê bi serokatiya Pêşewa Qazî Mihemed di sala 1946'an de, şoreşvanên kurd ên germiyanê bi hev re di xizmetkirin bi vê Komarê rolekî mezin û ji bîr nekiri lîstin.

Kar û xizmetên wan hertim dê weke rûpeleke zêrîn a hevpewendiya neteweyî ya gelê Kurd di dîrokê de bimîne û azadîxwazên Kurd û Kurdistanê berdeham di tekoşîna xwe de weke tişteke pir buha dê lê binêrin û bi merema hevpewendî û hevqederiya gelê azadîxwaz yê xwe hîn bibin û waneyên wan dikin çirayê tekoşînê, bona bidestveanna desthilat û serweriya neteweyî.

Eşkere ye ku di zirûfa wê demê de zanebûn, pisporî û ezmûna van Efserên welatparêz ji bo rêxistina Hêza Neteweyî a Kurd ku erkê parêzvanîyê ji Komara Kurdistanê li stû bû, pir giring û berçav bû.

Efserên xebatkar tevî pêlek ji Efserên din yê niştîmanperwer, zanîn û



Izet Ebdulezîz

Xeyrola Ebdulkerîm



Mihemed Qudsî

Mistefa Xweşnav

pisporiya xwe ji rêxistin û nûjenkirina herçiqas zêdetir ya hêza neteweyî ya Komara Kurdistanê terxan kirin. Mistefa Xoşnav û Mihemed Mehmûdê şoreşvan, weke şewirmendên çekdarî erk li stû girtibûn, Efserên din jî her yek li gor karîna xwe fermandehiya beşekê ji hêzên Komarê bona parastina destkevtên neteweyî yê wê komarê li stû girtin. Bi vî awayî xizmeteke jêhatî û jîbîrnekirî pêşkêşî Komara Kurdistanê û armancên bilind û neteweyî ên wê kirin. Bi birêvebirina wan erkan jî, navê pîroz ê wan dê bo hertim weke stêrkên geş yê

esmanê tevgera rizgarîxwaziya Kurd û Kurdistanê bi ronahî bimîne.

Piştî hiloşîna Komara Kurdistanê, ew çar Efserên şoreşger tevî hindêk ji Kurdên din yê Başûrê Kurdistanê li ser soz û binav lêborîna Karbidestên wê demê yê Bexdayê, vegeriyanê Îraqê. Lê bi kul û kesereke giran ve rejîma dijî gelî ya Îraqê, bi piştîkirin bi ehd û sozên xwe li derheq lêborîna wan şoreşvanan, her çar leşker di bervara 29'ê Cozerdana 1947'an ya Zayînî de, bi hêceta xizmet bi bizava rizgarîxwazane ya Kurd, lidar vekirin.

Tu şik û gumanek tê de nine ku heke ev Efserên şoreşger di pêxema xizmetkirin bi xebata berheq ya gelê Kurd, biwêrane waz ji pile û payeyên dewletê anîn û bi hemû karîna xwe, lêzanîn û pisporiya xwe ji bo pêşveçûna zêdetir ya şoreşê terxan kirin, îro egîdên Kurd tevî wê çendê ku rolê pêşengiya wan serwerane ji bo desthilgirtin ji pileya civakî û jiyana taybetî ya xwe bilind dinirxînin, bi şanaziyê ve çav ji mêrxasiya wan dikin û weke sembol û rênîşander jê

mêze dikin.

Heke rejîma Îraqê ev qehreman tevî çendên din, jinav birin, îro rojê nav û hêviyên bilind ên wan zindî ne û tewr beşek ji welatê wan bi sedema cangoriya ewên ku di bin sîbera bibandor a wan û tekoşerên din yê tevgera Kurdîtiyê de, ev rêbaze girtine pêşîya xwe, ji aliyêke din ve desthilata bikujên wan çûye zibildaniya dîrokê û ji mînakên wan re jî bi hikmê dîrokê çarenivîseke baştir ji wan nabe.

Nav û bîranîna wan hertim pîroz û bilind be.

Rê û Resmek Bi Boneya 20'emîn Salvegera Kîmyabarana Serdeştê Birêve Çû

Roja 28.06.2007'an, bi beşdariya 3-4 hezar kesan, rê û resmek bi boneya 20'emîn salvegera kîmyabarana bajarê Serdeştê li wî bajarî de birêve çû. Beşdarên rê û resmê çûne ser gora şehîdên vî cinayetê û destegulên sor li ser qebrên wan danîn. Piştî Pêşnimêjê bajarê Serdeştê axaftinek li ser wê bûyera biêş pêşkêş kir. Herwiha ji aliyê pêşkêşkarê rê û resmê ve jî çend parçe helbest bi vî boneyê ve hatin pêşkêşkirin.

Di beşeke din a rê û resma han de, girûpa Şaxevanî ya bajarê Serdeştê piştî hatinexwar ji çiyayê hemberî goristanê, destegulên rêz û emegnasîyê li ser gora şehîdên vî cinayetê danîn.


Hêjayî gotinê ye ku qîrar bû bi beşdariya Hedad Adil, Serokê Meclîsa Şewra Îslamî ya rejîmê, rê û resmek bi vî hincetê li bajarê



Serdeştê de birêve biçê, lê bi sedema neçûna wî bo Serdeştê, rê û resm nehat lidarxistin.

Herweha qîrar bû ku bi beşdariya taqimên Karatê yê welatên Îngîlîs, Fransa, Norwej, Lehistan, Japon û taqima netewî ya Îranê jî kêbirkêyek Karatêyê birêve biçê, lê ew tîm bi taqimên Karatê yê welatên Fêlêstîn, Turkiye, Îraq û Efxanistanê guherîn. Herweha tîma millî ya karatêya Îranê jî li vî pêşbirkêyê de beşdarî nekir.

Şandek Komîsyona Kar û Barên Têkiliyên Derve Ya PDK Îranê Tevî Şandekê Partiya “Fremskrittspartfirp” ê Li Welatê Norwejê Hevdîtina Pêk Anî



Navend Nûçeyan ya PDK Îranê da zanîn, roja 21.06.2007'an Şandek Komîsyona Kar û Barên Têkiliyên Derve Ya Komîteya PDK Îranê li welatê Norwejê di hola Parlemana wî welatî, bi heyetekê ji Partiya “Fremskrittspartfirp”ê re hevdiîn pêk anî.

Di rûniştineke germ û dostane de, şandeya PDK Îranê baseke kurt li ser dîroka PDK Îranê û bernamê û siyasetên partiya me û her wiha li ser rewşa Îran û herêma pêşkêş kir û bal kişande ser fitne û têkderiyên rejîma Komara Îslamî ya Îranê li deverê, nemaze maytêkirinên vê rejîmê di karê hundir yê welatên Îraq, Lubnan, Filistin û Efxanistanê.

Di vê der barê de, şanda Norwejî bi tevahî tevî şanda PDK Îranê hevber û raman bûn. Her du alî li ser vê baweriyê bi tevahî hev fikir bûn ku rejîma Komara Îslamî a Îranê gefeke micid û mezin bo ser xelkê Îranê ye û ne tenê divêt hemû cihan û welatên herêma berahiya pêvajoya bidestxistina vê hikûmetê bi çekên komkuj bigirin, belkî divê civaka navneteweyî bi lez û micid di fikra peydakirina rêçareyeke jêhatî û pêwîst ji bo guherîna sîstema Komara Îslamî ya Îranê bibe.

Şandeya Komîsyona Kar û Barên Têkiliyên Derve Ya Komîteya PDK Îranê pêkhatî bû ji: **Fireydûn Elîxanî**, Berpirsiyarê Komîsyonê û **Ezîm Elyasî**, endamê Komîsyonê û heyeta Partiya “Fremskrittspartfirp”ê ji van kesane pêk hatibû: **“Morten Hoglund”**, endamê Parlemanê û berpirsiyarê Desteya Nûneriya Norwejê li Rêxistina Ewlekarî û Alîkariya Ewropayê û endamê Komîteya Kar û Barên Pêwendiyên Navneteweyî yê partiya han û her wiha **“Palarne Devidser”**, Ravêjkarê Siyaseta Derve yê Partiya han bûn.

Hêjayî gotinê ye ku Partiya “Fremskrittspartfirp” duyemîn partiya mezin ya Norwejê ye.

Gerrek Kurt Di Dîrokê De ...

Amadekar: Nûredîn Sofizade

16.06.1947: Mela Mistefa Barzanî tevî 500 kes ji Barzaniyên çekdar ên xwe piştî 20 rojan rêçûnê, ji çemê **Eres** ê derbasî nava axa Soviyeta berê bûn.

16.06.2006: Konferanseke navneteweyî bi beşdariya **Mistefa Hicrî**, Sekreterê Giştî yê PDK Îranê û nûnerên neteweyên din ên Îranê û zaf kesayetiyên siyasî û akademîk ên biyanî li jêr navê **“Îran ber bi kîderê ve diçe”**, di yek ji holên Parlemana Fransayê de birêve çû. Konferans ji aliyê Enistîtuya Kurdî ya Parisê bi egera serdana birêz Mistefa Hicrî hate lidarxistin.

17.06.1980: Radyo **Dengê Kurdistanê Îranê** bi cehd û bizava PDK Îranê û nemaze xebatên şehîd Dr. Abdulrehman Qasimlo hate damezirandin û kete xizmeta gelê Kurd.

17.06.1984: **Rehman Erebi**, endamê Komîte Şaristana Urmîyê di girtîxana rejîma Komara Îslamî de hate îdamkirin.

18.06.1986: Hêzên Komara Îslamî a Îranê êrîşkê berfireh kirin ser gundê **Dişe** û tevî berxwedaniya Pêşmergeyên PDK Îranê ên **Hêza Şaho** berbirû bûn. Di vê şerê de ku hêzên dijmin derbekî giran xwarin, mixabin 6 Pêşmerge bi navên: **Mirad Weledbeygî, Behmen Selîmî, Abdulrehman Xeyatî, Fetah Fetahî, Hadî Mihemedî û Emîn Mesedî** şehîd bûn.

19.06.1919: Qewimîna Şerê Derbenda Bazyanê di navbera Şoreşvanên Kurd bi serkêşiya **Şêx Mehmûd** û hêzên Birîtanyayê. Piştî şerekî bi xwîn û giran, aqibet Kurd rastî têkçûnê hatin û Şêx Mehmûd bi birîndarî hate girtin û dûrxistin.

19.06.1947: Îdamkirina 4 Efsere şoreşvan ên Kurd ji aliyê hikûmeta Îraqê bi sîqa beşdarîkirin di Hikûmeta Komara Kurdistanê li Mehabadê de. Ew 4 Efsere şehîd ev bûn: **Mistefa Xoşnav, Xeyrula Ebdulkerîm, Mihemed Mehmûd û Ezet Ebdulezîz**.

19.06.1988: **Mihemed Şerîf Bizindar**, Fermanderê Pel ji Hêza Şaho tevî Pêşmergeyêkî din bi navê **Zahîd Pakzad**, li Kûselana devera Merîwanê şehîd bûn.

20.06.1789: Şoreşa Mezin ya Firansayê dest pê kir.

20.06.1960: Helbestvanê Welatparêz yê Kurd, **Pîre Mêrd** koça dawiyê kir.

21.06.1930: Şehîdbûna rêberê navdar yê Kurd **Simayîl Axayê Simîtko (Simkoyê Şikak)** ji aliyê rejîma Pehlewî ji rêya Kompoyeke îxanetê li bajarê Şinoyê.

21.06.1971: Pêkhatina Konferansa 3'yan ya PDK Îranê li bajarê Koyê û diyarîkirina rêbaza siyasî ya partiya.

21.06.1990: Bi sedema erdhejê xurt li bajarên Rûdber, Zencan û Gilan a Îranê, bi dehan hezar kesan jiyana xwe ji dest da.

22.06.1996: Li ser tixûbê Îran û Turkiyê li çiyayê **Duguh**, bi sedema êrîşa Arteşa Turkiyê û li encama şerekî dijwar û nexwestî de, mixabin 8 Pêşmergeyên PDK Îranê li Komîte Şaristana Selmasê bi navên jêrîn şehîd bûn. **Sadiq Hesenzade, Emîr Cehandîde, Cemal Raî, Şemsedîn Resûlî, Eskender Elîzade, Qadir Emîrzade, Resûl Hemidî û Ebdî Baqoyî**.

24.06.1921: Di demekê de ku li piraniya deverên Kurdistanê de serhildanên Kurdan hebûn, **Çirçîl** di biryarekê de ragehand ku divêt dewleta Kurdan bê avakirin, heya ku dever aştî û aramiyê xwe ve dibîne.

25.06.1945: Li bajarê Sanfiransîskoyê, bi beşdariya nûnerên 50 welatan Menşûra Rêxistina Neteweyên Yekbûyî hate îmkazkirin.

25.06.1985: **Cehanbex Nasirî**, Fermanderê Pel ji **Hêza Dalaho**, tevî Kadroyekî bi navê **Emîn Mihemed** li Çiyayê Şêrekel li devera Ciwanroyê şehîd bûn.

26.06: Roja Cihanî ya Xebat Li Dijî Madeyên Hişber “Narkotîkê”.

26.06.1924: Bombabarana bajarê Silêmaniyê, ji aliyê hêzên Birîtanyayê û girtina wî bajarî.

26.06.1950: **Rezm Ara** bû Serok Wezîrê Îranê.

26.06.1972: Hunermendê dengxweş **Hesen Zîrek**, li bajarê Bokanê koça dawiyê kir.

28.06.1985: **Resûl Azirexş**, Fermanderê Lik ji Hêza Aware li herêma Pîranşarê hate şehîdkirin.

28.06.1987: Di dirêjiya şerê Îran û Îraqê de, balafirên rejîma cinayetkar ya Sedam, bajarê **Serdeştê** bi bombeyên kîmyayî bombaran kirin ku sedan kes ji welatîyên Kurd ên sivil bûne qurbanî.

28.06.1988: **Sidiq Firozî**, Cîgirê Komîteya Navendî yê PDK Îranê piştî şerekî mîrxasane li herêma Kamiyaranê hate şehîdkirin.

29.06.1925: **Şêx Seidê Pîran**, rêberê şoreşa Kurd tevî 46 kes ji şoreşvanên din ji aliyê dewleta Turkiyê ve hatine lidarvekirin.

30.06.1985: Li bajarê Bane de, şerekî dijwar di navbera Pêşmergeyên PDK Îranê û hêzên rejîmê de qewimî, piştî 8 seet şer ku hêzên dujmin tede têk çû, mixabin **Sergord Kerîm Eliyar**, endamê Komîteya Navendî yê PDK Îranê tevî 3 Pêşmergeyên din bi navên: **Ebabekir Kakebira, Silêman Mam Pîrotî û Hemze Şexeyî** şehîd bû.

Hiqûqên Bingeîn, Rexne Û Şiroveya Qanûna Bingeîn Ya Îranê

Beşa 3

Seyîd Mihemed Qurdoyî Milân
melanmohamad@yahoo.com

W; Dara Natîq



Her wek tê xuyakirin berhevdana qanûnên bingehîn ên welatên cur bi cur feydeyên zaf garantî kiriye, ku çawaniya peyda kirina rih û rîşa hêz û desthilatê û bingeha rewabûna wê di her civakê de,

pêkhatiya rêxistinî û nizma desthilatdar û nasandina navendên biryarder ji wan yekan in.

Qanûna bingehîn, di hin welatan de, dîmanekî nivîskî ye ji hêvî û armançên her neteweyekê û di hin welatên din jî, belge û dukumentek e ku pêkhatiyên bingehîn yên hikûmetê û erk û wezîfeyên wan dide xuyakirin.

Qanûnê din:

Yek ji jêderên qanûnên bingehîn, birêvebirina yasa û qanûnên hewce yên her welatekê ye. Bi taybetî ew qanûn û yasayên ku diyarkerê çarçoveyên bingehîn bûne yan jî zêrevanê çawaniya rêxistina pêwendiyên navbera dezgehên cur bi cur yên siyasî û hemû netewan bi hev re ye. Bo nimûne: qanûnên kêrhatîbûn û erkên Serok Komar, qanûnên hilbijartinê, qanûnên damezirandina partî û Komeleyên siyasî û pêkanîna heyetên lêkolîner, qanûnên ragihandinê û ... ji wan qanûn û yasayan, tên hesabandin ku weke jêderên qanûna bingehîn ku ji aliyê karzanan we mifah jê tê wergirtin.

Pejirandiyên Dezgeha birêveberî pejirandina nivîsarên dewletî û herwiha ayinnameyên birêvaberiye ku di rêza qanûnên asayî de, tên hesabandin, hin caran rol û giringiyekî taybetî di nasandina naverok û pêkhatina qanûna bingehîn a hemû civakê de dilîze.

Pêkanîna dadgeh û rêxistinên girêdayî bi dezgeha dadê ve:

Yek ji jêderên qanûna bingehîn, bîr û hizrên baskirî ne ku di hin waran de yasanas û hiqûqzanên welêt mifahê jê werdigirin. Dadgehîkirinên xewdî bas û gengeşeyên siyasî û hikmên derkirî li ser wan, hertim bûye hegera pêkanîna bizavên hizrî û siyasî di civakê de û bala tex û qatên civakê bo aliyê xwe dikişînin.

Ew bîr û rayên ku dadwerên dadgehan û berpirsyarên derkirina biryaran(hukman) eşkere kirine, di rastî de eyankerê cura lêniherîna beşek ji desthilatê bi pirsên di nava civakê de ne, yan jî bi berçav birêve çûne, ku çavkaniyê gellek girîng ji bo vê şax ji zanista hiqûqê ye. Deng û bîr û rayên saziyên ser bi dezgeha qezayî jî caran rolekî weha dilîzin. Bo mînak, heke Dîwana Edaleta Îranê pejirandiyêke dewletî betal bike, di rastî de yan radeya desthilata dezgeha rêveberiyê berteng kiriye, ew jî helbet bi armanca parastina mafê xelkê yan jî rolê xwe di warê serrastkirina şiroveyên berpirsyarên rêveberê di yasaya bingehîn de dilîze.

Çawaniya lêniherîna dadwerên Dîwana Edaleta Îdarî li ser pirsên baslêkirî û naveroka hukmên derkirî, nişanderê cura lêniherîna dadmendên xwedî kar di wê dezgehê bi nîzama siyasî ya hakim li ser civakê û qasê desthilat û karên wan dibe.

Gotûbêjên nûnerên Parlemanê:

Ew gotûbêj ku di dema danîna yasayan de cîbicî dibe, çavkaniyêke gellek baş e bona naskirina çawaniya pêkhatina

hêz û qawetê. cîbicî bûna wê û şeweya serûber kirina hêzên sê aliyane ku gişt di bin destê rêber de ne û radeya desthilata wan li berçav e.

Di gişt welatên cihanêde heyetên taybet dibne biryarderê nivîsandin û danîna pêşnûsa yasaya bingehîn. ku piştî pejirandina dawiyê, heyetên baskirî, dixin ber referandomê, ku ji van heyetan bo meclîsa bijarteyan tê şandin. li welatê Îranê ji navê meclîsa bijarteyan mifah hatiye wergirtin. Baldana bi gotûbêjên van cure meclîsan, destberiya têgihîştin ji sebeb û pejirandina her madeyêke yasayî û her eslek ji usûlên yasaya bingehîn bûne û heta çavkaniyêke gellek girîng ji bo şiroveya azî û usûlên yasaya bingehîn bihê nasîn. vira em tevî vê pirsê berbirû dibin ku heke usûlên yasaya bingehîn ji rêya referandomê ve yanî bi awayekî rasterast ji aliyê xelkê ve be, bes hebûna meclîsa bijarteyan di serrastkirina wê de dikare xwediyê çî wate û mijarekê be? Bo mînek, di esla 44'ê a yasaya bingehîn de, nîzama aborî a Îranê bi sê beşan tê parvekirin. Beşa dewletî xwedîtiya giştî li jêr destê dewletê de ye, û beşa zibare(teawînî) weke şirket û saziyên zibareya berhemandin û dabeşkirinê hatine nasîn û beşa taybetî jî pêk hatiye ji wê ji cotkar, pezdarî, pişesazî û xizmetan bûye ku tewawkerê çalakîyên aborî di beşa dewletî û beşa zibare(teawînî) de ne. Bi sebebê vê yekê ku aborî di beşa dewletî û beşa zibare de bi awayekî hûr nehatiye pênasekirin, lewra hertim vê behsê her dirêjî hebûye, ku gelo rastî mirov dikare banka taybetî jî ava bike?

Gelo beşa taybetî dikare îzgehên radyo û televîzyonan ava bike?

Baldana bi behs û gengeşeyên meclîsa bijarteyan ew şik û gumanên di esla 44'ê de kêmekê jî nekariye ji nav bibe. Herwiha bi baldana bi behs û gengeşeyên nûnerên Meclîsa Şevra Îslamî jî, îsbat divêt ku ew dibe rola nehêlana şik û gumanan û şiroveyên sererast ji qanûn û usûlên bingehîn bilîze.

Ji Mensûr Teyfûrî Re, 6 Meh Zîndan

Ji aliyê Dadgeha Şoreşa Îslamî ya Merîwanê ve, ji Mensûr Teyfûrî, nivîskarê bi nav û deng ê Siqizê û endamê Navenda Nivîskarên Îran û Kurdistanê re, roja 26.03.1386(16.06.2007)an, 6 meh hikmê zîndanê hate sepandin.

Teyfûrî, bi buxtana derbasbûna neyasayî ji sînor, hebûna têkiliyan tevî partiyên siyasî yên Kurdistanê û xebat li dijî tenahiya neteweyî, çend rojan di girtîxaneyê Îdareya Ewlekariya Sine de ma û piştê bi danîna berdêleke 30 milyon tûmenî, serbest hate berdan.

Hewce ye were gotin ku navhatî berhemên zaf di warên hizr û siyasî de weke pirtûkên "Tecrûbeyî Mudêrnîte"(Ceribîna Nûjeniyê), "Le Mer Lokaç"(Derheq Lokaç), "Tiyoriyekani Feheng"(Teoriyên Çandê), "Komele Witarekani Ciwanî nasî"(Komele gotarên ciwanî nasînê), wergerandina ser zimanê Kurdî.

Rewşa Nebaş Ya Goriyên Bikarînerên Madedyên Bêhişker Li Komara Îslamî Ya Îranê

M alpera "Iranpressnews"ê ji zimanê Nûçegihaniya "IRNA"yê êşkera kir ku xincî ew navendên ku bi awayê qanûnî û di çarçoveya yasayê û di bin zêrevaniya saziyên taybet de dixebitin, pir navendên din jî bi awayên ne qanûnî, li bajar û heta gundan de mijûlê çalakîyê ne û seba piropagandeyên zaf û berfireh karîne bibin xwediyê pêşkeftin û dahateke baş.

Bi lênihêrînek li ser navendên ne yasayî ên "**destberdana ji îtiyadê**" ku bêşik ji aliyê kesên ne şareza û bê pirsorî û vala ji zaniyariyên tendurustiyê ve tîr birêvebirin, xuya dike ku çalakîyên navendên han û dana dermanan di bin navê "**destjêberdana îtiyadê**" de, ne tenê nabe sebebê rizgarbûna kesên ku madedyên sirker bikar tînin (mutad), belkî encamên nebaş ên zayendî û ruhî jî ji wan re pêk tîne û heta dibe sebebê mirina wan.

Hindek ji van navendan bi piropagandeyên weke "**devjêberdana îtiyadê**" karîne xelkê bixapînin û bibin xwediyê dahateke baş.

Di vê navberê de ewa ku ji bo kesên mutad û malbatên wan ciyê nigeraniyê ye, kifşnebûna navendên yasayî û ne qanûnî ji hev in. Rastî eva ye ku li ser her duyan kontrol û zêrevaniyê baş nahê kirin û ewa bi xwe ciyê tirsê ye.

Li gor gotina nojdarekê, piraniya navendên ne qanûnî ên "**destjêberdana îtiyadê**", wan cure dermanan bikar tînin ku ji madeyên sirker ên xaw û kîmyayî pêk tîne. Dermanên han ne tenê nabe sebebê rizgarbûn ji mutadbûnê (bikaranîna madedyên bêhişker), belkî heta astê tûşbûnê zêdetir dike û di dawiyê de dibe sebebê mirina wî/ê.

Herwisa li gor rapora nûçegihaniya "ILNA"yê, Dr. Homen Narincî, Cîgirê

Navenda Daryûş, di civîneke lêkolînî û guhertina bîr û rayan a lêkolîvan û karnasan li ser mijara fêde û qazanca bikaranîna madedyên sirker de, tevî îşarekirin bi encamên herî dawî ên di biyaya îtiyadê a di navbera 6 hezar kes ji kesên bikarînerê madedyên bêhişker de got: "Li gor encama vê lêkolînê, %17 ji bikarînerên madedyên bêhişker, 20 heya 24 salî ne, %23 di navbera 25 heya 29 saliyê de ne û pareke zaf ji wan di navbera 20



heya 34 saliyê de ne."

Wî zêde kir û got: "Navinca temenê tev bikarînerên madedyên sirker, 32 sal e û di salên borî de, hejmara kesên tûşbûyî bi madedyên sirker di nava ciwanan de zêde bûye, bi awayekê ku temenê îtiyadê nêzik bi yek sal û nîvan jêrde hatiye."

Wî tevî îşarekirin bi vê çendê ku li gor serhejmariyên heyîn, nêzik bi %7 mutadan (bikarînerên madedyên bêhişker) jin in, bibîr anî û got: "Rengê hindê dide ku hejmara mutadên jin ji vê hejmarê zêdetir be û hindek pirs û astêngên heyî di civakê de ku dibe sebebê pêşgirtin ji seredana jinan bo navendên dermanî, çareserkirina pirsê îtiyadê di navbera van mutadan de tevî dijiwariyên zaf berbirû kiriyê."

Sebeba Sereke Ya %70 ji Kirîz û Pirsgirêkan, Bêkarî Ye



Îro rojê Bêkarî pirsê herî mezin ya civaka me ye. Bi lênihêrînek kûr û girseyî mirov jî re eyan dibe ku pirsê zewicîna ji pirsê bêkariyê mezintir e. Bêkarî yek ji sebebên herî sereke ye bona pêkhatina pirsgirêk, kirîz û fisadên civakî, ku bi awayekî herî berfireh û xurt di civakê de belav bûye.

Bêkarî yek ji wan kirîzên herî dilêş e ku civaka me ya ciwan tevî xwe ber birûkiriye. Xwe rakêşana ciwanan bo aliyê dewletê û nebûna pêwîstiyên hewce bo danîna sermayeyên rêxistinî bona pêkanîna kar, yek ji wan pirsan e ku di darêtîna budceyan de gellek bi kêmi tê liberçavgirtin.

Hebû na bêkariyê, encama wan siyasetên şas û nedirust e ku îro rojê gişt birêveber û siyasetvan, bi berfirehî bas lê dikin. Li ser vê çendê ku sedemên cur bi cur bûne sebebê pêkhatina kirîza han, gotinek tune ye!

Di sala 2006'an de weşana lêkolînê aborî a Rojhilata Navîn (MÎS), di raporeke kemilî a şiroveyî de li ser kirîza bêkariyê di Îranê de nivîsand: "Kirîza bêkariyê di Îranê de, %40 xelkê vî welatî anku 28 milyon kes bi xwe ve girtiye û gişt nifûsa civakê bi awayekî rêjeyî tûşî xizanî û feqra aborî kiriyê.

Her îsal dewleta Îranê bi xwe ragehand ku %12 xelkê wî welatî bêkar in. Lê serhejmariya han ji aliyê çend şarezayan, nerast hatiye zanîn.

Cîgirê pêwendiyên kar ya Wezareta Kar û Barên Civakî yê Îranê di vê derheqê de got: "Yek alîbûna aboriya welat dibe sebebê xurtirbûna bêkariyê di welat de û niha kirîza bêkariyê jî yê bûye sereketirîn pirsê bajarên mezin".

Astê bêkariyê di parêzgehên Îranê de bi hev re ferq hene û astê herî zêde a kirîza bêkariyê di parêzgehên li ser sînoran de ku piraniya wan di warê olî ve Misilmanên Sunî ne û ji parêzgehên belengaz ên Îranê ne, ji bajarên dinê ye Îranê jorêtir e. Her 4 parêzgehên Kurdan li Îranê, di vê hêla xizanî û bêkariyê de çih girtine.

Rojê 54 Jinên Îranî Bona Îstîsmara Zayendî Li Welatê Pakistanê Tê Firotin

Li gor rapora Wezareta Karê Dereve ya Amerîkayê derheq qaçaxa jin û zarokan di cîhanê de, welatê Îranê di pileya sêyem (pileya herî dawî di warê xebat li dijî qaçaxa mirovan de) cî girtiye zû jinên Îranê di hundirê welat de bi armanca fahêşe û karê bîxelaqiyê û mîrkirina neçarî bi merema dana qeran tînin qaçaxkirin.

Herwiha di raporê de hatiye "Îran weke çavkaniyekê ye bona hatin û çûn û akincîbûna wan jinên ku bi armanca alvêra zayendî û xulametiya ne jidil hatine qaçaxkirin.

Pêka rapora han zarok jî di hundirê Îranê û Efxanistanê bona pêkanîna jiyana havbeş a bi zorî, îstîsmara zayendî û koletiya bi zorê weke xwezok û karkeran ber bi Îranê tînin qaçaxkirin. Herwiha jinên Îranê bona îstîsmara regezî ber bi welatên Pakistan, Turkiya, Qeter, Kuweyt, Mîrîtiyên Erebbî, Fîransa, Almanya û Îngîlistanê tînin qaçaxkirin. Bi terzekê ku rojê 54 jinên Îranî li temenê 16 heya 25 saliyê bona îstîsmara regezî li welatê Pakistanê tînin firotin.

Li dirêjahiya rapora han de hatiye ku dewleta Îranê bi awayekê hewce tevî îstandardên pêşgirtin ji qaçaxê hevkarîyê nake û di vê derheqê de xwe nawestîne. Rapora navhatî vê çendê êşkera dike ku rejîma Îranê goriyên qaçaxa mirovan bi terzeke hovane û bi zîndanîkirin û daliqandin û ... ceza dike.

Di dawiya raporê de daxwaz ji dewleta Îranê hatiye kirin ku bona pêşgirtin ji cezadana goriyên qaçaxê gavên hewce bavêje û galaleyekê darêje ku kesên karê qaçaxê dikin, bîr girtin û cezadan û pêşî ji qaçaxê were girtin.

Mafên Hewelatîbûnê

Mihemed Milanî

W: Hemîd Muxtarî

Mafên mirovan, bi zindî ji dayîkbûna her mirovekê dest pê dike û bi mirina wî/wê bi dawî têbe. Her mirovek ku ji dayîk dibe û tê ser rûyê dinê, xwediyê mafên **medenî**, **siyasî** û **civakî** ye. Helbet mafên han bi awayekî rêzokî bi hev re girêdayî ne û bêy hebûna ewlehî û tenahiye pêk nahên.

Ev mafên han pêk tînin ji:

A) Mafên Medenî

Mafên medenî(sivîl) bi mafên takekesî di yasayê de tê gotin. Ev maf hindêk îmtiyazan bi xwe ve digire ku îro rojê ji aliyê piraniya me ve hatine pejirandin, lê bidestveanîna wan demêke dirêj dixwaze. Mafên sivîl yanî eva ku her kesek bikare bi dilê xwe di her çiyekê ku hilibijêre bijî, di warê ol û bîr û raderbirîna de azad û serbest be, mafê xwedîtiya taybetî hebe û xwediyê mafên wekhev li hember yasayê de be. Lê mixabin heya niha ev mafê rewşa di Îranê de nehatiye birêvebirin. Heta di hindêk cihan de yan baştir e em bibêjin di zaf herêmên Îranê de, bi terzê nemirovane û dûr ji yasayên navneteweyî tê bînpêkirin, bi xasmanî derheq mafê jinan, rejîma Îranê tu rêzokê jê re nagire û herçend ku pir caran ji aliyê saziyên navneteweyî û mafên mirovan de derheq vê çendê hatiye mehkûmkirin û hişyarî jêre hatiye dan, lê ev yek ne tenê nebûye sebebê li berçavgirtina mafên mirovan ji aliyê rejîma Îranê ve, belku kiryarên han bi awayekî berfirehtir û bi êşkere û nepenî ji aliyê karbidestên rejîmê ve tê birêvebirin.

B) Mafên Siyasî

Cura duyemîn a mafên hewelatîbûnê, mafên siyasî ne, bi xasmanî mafê beşdarîkirin di hilibijartin û xwe berendamkirin di hilibijartinan de. Mafên han ji bi rihetî bidestve nehate, jin neçar mane mideheke zaf bendewar bimînin û ev mafe heya astekê di encama xebata bizavên jinan û heya astê demdirêjî di encama beşdariya jinan di aboriya fermî li



dema şerê Îran û Îraqê û herwiha mehkûmbûna rejîma Îranê derheq mijara han li hember qewl û sozên xwe ji bo ew sazî û rêxistinên navneteweyî misoger bûne.

C) Mafên Civakî

Cura sêyemîn ya mafên hewelatîbûnê, mafên civakî ne. Mafên han tê wateya rihetiya aborî û ewlehiya civakî bo tev xelkê di civakê de. Mafên civakî yanî hebûna îmkanatên saxlemî, dabînkirina hewcedariyên jiyane li dema bêkariyê û diyarîkirina astê heqdestê. Bi gotineke din, mafên civakî pêwendî bi xizmetkirinên rihetiye di civakê de heye. Herçiqas ku di pir herêmên Îranê de berî dabînbûna mafên yasayî û civakî, îmkanatên cur bi cur ên rihetiye hatibûne dabînkirin, lê li gor mafên civakî û ewlehiya jinan di civakê de, siyasatên paremayî û qirêj tînin domkirin û mafên wan bi êşkere ketine tirsê. Mafên civakî, mafên herî dawî bûn ku pêk hatin. Sedema vê çendê eva ye ku gihîştina bi mafên medenî û bi taybet mafên siyasî di rastî de bingeha xebat bona bidestveanîna mafên civakî ye ku tê wateya heysiyeta zatî û ewlehiya canî. Gelo bidestveanîna vê yekê di çarçoveya desthilatdariya rejîma niha ya Îranê de tê dîtin?!

Divêt were gotin ku di rastî de ev yeka

di rejîma Îslamî a Îranê de tenê weke dirûsmekê ye li ser rûpelên yasaya bingehîn a rejîmê û bi awayekî piratîkî qet nehatiye û nahê çibçîkirin. Rejîma Îranê demêke dirêj e ku biryara mehkûmkirinê li ser jinan daye sepandin û biryarên weke zîndanê bi armanca perwerdekirina jinan û guhertina riftara wan derheq xwestekên Melayan der dixin yan bi sûça neparastina li xwekirinê li gor ola Îslamê tînin mehkûmkirin. Li vir pirsek tê holê, Erê gelo çawaniya lixwekirinê yan girêdana desmalan e ku ewlehî û dîspîlîn û yasayê dixê tirsê û divêt weke sûça resmî were nasandin û sûçbar bi vî terzî bînin cezakerin, yan terorên di nava şeqaman ên çend salên borî di bajarê Tehranê de ji aliyê "Besic" û "Pasdar"an?!

Yan belavkirina goştê pîs yê heywanan di nava xelkê de ji aliyê rejîmê ku bûye sebebê peydabûna nexweşiyên bêcareserî di civakê de, yan cezadana xwendekaran di 18.04.1378'an, de tenê bi sûça dana dirûsmên gel serdestiyê û avêtina kevçikan ji qada sêyem a xewgehan, yan belavkirina madeyên sirker di navendên temînî û hînkirinê û tûşkirina ciwanan bi madeyên bêhişker?! Herçend ku rejîma Îranê îdeaya vê çendê dike ku li gor sozên xwe li hember saziya navneteweyî û rêxistinên din yê mafên navneteweyî li dijî girûp û bandên qaçaxa madeyên sirker xebatê dike, lê di rastî de rejîma Îranê yekemîn sebebkarê xurtbûn û berfirehbûna madeyên sirker di nava ciwanan de ye û bi destê xwe jiyana ciwanan ji wan distîne, kîjan divêt werin mahkûmkirin û cezadan?!

Erê gelo eva ne rast e ku ne wekhevîya jin û mêran di civakê de gihîştîye qasê xwe û rejîm qet nikare wan riftarên xwe ên nemirovane li dor jinan veşêre û vê siyasatê bide sekinandin. Rejîma Îranê get îznê nade ku jin werin nav meydana siyasatê de û heke îzna dengdanê di hilibijartinan de dayiye wan, ne ji ber vê çendê ye ku bawerî bi mafê jinan bona dengdanê hebe, belku bona jordebirina astê dangan û mifahwergirtina xirab ji dengdana jinan li hember raya giştî a cîhanê ye. Di dawiyê de divêt bibêjim ku bidestveanîna mafên hewelatîbûnê qet di çarçoveya rejîma Komara Îslamî a Îranê de nahên çibçîkirin.

2 Jinên Kurd Xwe Kuştin

Keçeke 25 salî li Urmîyê xwe kuşt

Nûçegihanên Rêxistina Mafên Mirovan ya Kurdistanê (RMMK)ê, dan zanîn ku roja 29.03.1386 (19.06.2007)an, keçeke ciwan ya 25 salî bi navê **Perwîn**, keça Mela Rehîm, akinciyê gundekî derdora Urmîyê, bi guleya tivingê dawî bi jiyana xwe anî. Keça navhatî, di malbateke olî de dijîya û tê gotin ku bi sedema nerazîbûna malbata

wê ji bo zewicîna a bi xortekî re, xwe kuştîye.

Jineke 22 salî li Kamyaranê xwe şewitand

Herwiha nûçegihanên "RMMK"ê êşkere kirin ku jineke 22 salî ya bi navê **Firîşte. Q.**, ya gundê Xanimava a derdora bajarê Kamyaranê xwe şewitand. Tê gotin ku wê ji ber pirsgrîrêkên malbatî midehekê li mala bavê xwe dijîya ku piştî veşeriyên bo mala mêrê xwe, roja 18.06.2007'an, agir berda laşê xwe û ji ber xurtiya birînan, jiyana xwe ji dest da. Firîşte, kurekî 4 salî jî hebûye.


Pirsgrîrêkên malbatî heya niha yê bûne sedema xwekuştina gellek keç û jinên Kurd.

Cendekê Jineke Kuştî Li Seqizê Hate Peydakirin

çend rojan berî niha li taxeke bajarê Seqizê, termê jineke 25 salî hate peydakirin. Tê gotin ku nîşaneyên îledanê û fetisandinê li ser cendekê wê hatine dîtin û renga ew jine hatibe kuştin.

ZANÎN Û PERWERDEHÎ

ADAR JIYAN
adarjiyan@mynet.com



Kaniya Helbestan



Serbest Urmiye

Îşev

Îşev
Dê bibare baran
Û
Ne rêwîng im ez
Karwanê dil
Bêtirsa rêgir
Derbas dibe ji av û agir
Lê
Di benda dil de mame ez
Refên karwan
Dê
Bişkênin îşev
Sînorên dil û
Di benda tayek zulfên
Por sorek dilxapîn de
Biqeyd û zincîr im ez
De birêkeve, bişkêne
Karwan
Di bin reş perdeyên
Şevên evînkû de
Bidengê bilûra pêşeng û çavşîm
Sînorên tarîgirtî yên dil
Da
Reha û serbest bim
Ji qeyda dil û
Tirsa
Kore kundên şevperest

Ez ...

Ji ber
Pêlên behra reşgirtî ya dil
Hatin û xendiqîn
Hezar evîn, min di sîng de
Di ...
Lehiya reşava rûbarê dil de
Çûn ji min
Tev dildar û dilber
Tevgerên çerxa gerdûn
Ji bîriya rojê birin
Dilên bêdildar û
Esman, veşartim ez
Ta ku mest û medhûş
Bi tenê
Bêdildar û deng
Di kambaxa kuncê meyxaş de
Bûm ...
Hevsêyê saqiyê meyfiroş
Ê ...
Bêdil û xeber ji dil
Carna
Bi camek ava tirî
Ji bir dikim, ez jî xwe

serbesturmiye@hotmail.com

Hewldana mirovên zana û perwerdekar a pêzanîn, derdorasîn û xwenaskirinên civakî ji dîroka mirovahiyê de dest pê kiriyê û heta

îro hatiye. Ji wê rojê û vir de ye ku mirovên pejnkar û rûmetdar li ser vê yekê radiweestin, eleqedar dibin û serê xwe diêşnin. Ev mirovên zehmetkêş û ked-dar bi vê jî nehatine ser; ketine nav liv û lêgerînên bibergeh û dorfireh.

Hikariya navbera mirov û xwezayê û her wiha pêwendiyê navbera heyîn û heyberên dinê, ji hêla mirovahiyê ve wekî qada pisporiyê serbixwe tê zanîn. Belê ya girîngtir ew e ku mirov vê pêwendiyê bi awayekî erênî bi kar bîne û jê sût û fêdeyê wergire. Ev jî bêşik bi rîya zanîn û perwerdehiyê bi dest dikeve.

Zanîn û perwerdehî du têgihên cihê, belê her wiha du têgihên têkildar ên bivênevê ne jî. Perwerdehî bi saya zanîne pêşve diçe; belê zanîn jî bi perwerdehiyê re digihîje encam û armanca xwe. Hewm û pevcivînê zanîne, xwe di qada perwerdehiyê de didin der. Heke perwerdehî tune be, hindekariya zanîne bi tena serê xwe bi kêrî tiştekî nayê. Hemû dane û komasiyên zanîne bi saya perwerdehiyê hatine/têne parastin û parvekirin.

Perwerdehî, bi zanîne pêk tê. Û zanîn jî dîsa bi saya perwerdehiyê zanîneke din hildiberîne. Perwerdehî, zanîne pêşve dibe, têkûz dike û wê li ser hîmê rastî û duristiyê diedilîne. Zanîn û zanyariya ku bi lêgerîn û dahûrandinên zanistî bi dest dikeve, bandoreke pir mezin li ser teknolojiyê û alavên teknolojiyê dihêle. Lewre rasteqîniyên zanistî, her wiha mîrateyên hevpar ên tevê mirovahiyê bi xwe re tinîn. Pêşveçûn an jî standardizasyona jiyane, dibe sedema pêşveçûna lêgerîn û lêpirsînên teknolojiyê. Lêgerîn û bikaranîna alavên teknolojiyê jî saxên zanîn zanyariyên demê bi re tîne.

Perwerdehî, dem û domana ku di pêvajoya kemilîn û geşedaniya mirovbûnê de pêk tê ye. Her çendî ku wekî têgihê nû bête zanîn jî, bi hezaran sal e ku ev yek li gorî merc û derfetên demê pêk hatiye.

Çi ye mirovbûn?

Mirovbûn, ew taybetiya ku mirov ji heyîn û heyberên din vediqetîne ye. Belê her mirov nikare xwe bigihîne asta mirovbûnê. Mirovbûn, taybetiyên mîna şarezahî, bêhnpakî, dilpakî û serbilindahiyê bi xwe re tîne. Her mirov, hişmend û aqildar e. Belê her mirov ne zana û şaraza ye. Şarazabûn bi zanîn û perwerdehiyê bidest dikeve. Mirov ne bi kodên xwe yên genetîk û ne jî bi kevneşopiyên xwe yên nijadî pêşve diçe. Ew, bi saya hewldanên zanistî, çandî, zana û zaneyane têkûz dibe û pêşve diçe.

Perwerdehî, tenê ne di bin sîwana

dibistanê de; her wiha ji malê bigiriin heta derûdor jî derûdor bigirin heta qada listik û hesîne û hengameyê... hemû der wekî qadên perwerdehiyê têne zanîn. Belê hîmê şardebûna mirov di malbatê de tê danîn. Ango perwerdehiya mirov a destpêkê ji malbatê belê nemaze ji dayîkê dest pê dike. Her mirov di zarokatiya xwe de pêşî li ber destê diya xwe mezin dibe. Sinc, tevger û livbaziyan diya xwe bi awayekî baldar dişopîne û jê bandor werdigire. Heke dayîk bi awayekî erênî hatibe şardekirin û perwerdekirin, dê şardebûn û perwerdekirina zarok bi awayekî erênî; belê heke dayîk ji perwerdehiyê zaneyane bêpar mabe, wê çaxê dê kesayetiya zarok bi awayekî neyînî teşe bigire.

Pêwendî, ragihandin û parvekirinên jiyane yên rojane hemû li ser hîmê pewerwehîyê hatine/têne avakirin. Zanyariya rastî, bi perwerdehiyê durist û têkûz dibe. Der barê vê yekê de Konfîçyûs wiha dibêje:

"Hêkeke te heye û hêkeke min.

Min hêka xwe da te û te jî hêka xwe da min

Hêkeke te çêbû û ya min jî bû hêkeke.

Dîsa bi te re hêkeke heye û min re jî yek. (ango tu guhertin pêk nehat)

Belê;

Zanîneke te heye û zanîneke min.

Min zanîna xwe da te û te jî zanîna xwe da min.

Du zanînen te çêbûn û du zanîn min."

Îro ro, tiştê ku hukmê xwe li ser zanîn û perwerdehiya mirov dike, yek jê jî jiyana bajarvaniyê ye. Jiyana bajarvaniyê bi awayekî dorhêl bandorê li ser tevger, bizav û kesayetiya mirov dihêle. Nemaze jî mirovên zarok û xeşim. Mirov di zarokatiya xwe de li kijan derû dorê û di kîjan civakê de bijî, dê li gorî merc û derfetên wê derûdorê û jiyana wê civakê dirb û dirûv bigire. Mirov digel mezinbûn û stewîna xwe ya asayî, ji hêla çand û civakîbûnê de jî diguhere û pêşve diçe.

Perwerdehî, ligel ku di her dem û domanên jiyane de bandorê li ser kesayetiya mirov dihêle jî, belê bandora herî domdar û mayînde bandora ku li ser jiyana mirov a zarokatiyê dike ye. Lewre kartêkeriya herî bibandor, kartêkeriya bajarvaniyê ya sikak, kolan û yarîgehên bajêr ên ku bi hem û alav û amrazên xwe, jiyana zarok dorpêç dike ye.

Kes dibe, civak dibe, heke baş hatibin perwerdekirin sûdewar û erênî, belê baş nehatibin perwerdekirin xisar û neyînî ne. Em ê gotara xwe, bi gotina ku têkildarî babeta me, ya Lord Brouham bi dawî bikin:

"Arastekirina kesên (mîrov an jî civakên) perwerdekirî hêsan, belê xirandina wan zehmet e; birêvebirina wan hêsan, belê dîkirin û kolekirina wan bêmikûn e."

Çend Gotin Derheq Muzîka Kurdî(Kurmancî) Li Kurdistana Îranê

Erselan Codetiyar

Heke em bixwazin derheq muzîkê bipeyivin, divêt em bibêjin ku di muzîka her neteweyekê de fikir, raman, hest, bawerî, şahî û xemgîniya wî gelî veşartî ye. Dibêjin li cihê ku ziman disekine, muzîk dest bi peyivîne dike. Di dirêjahiya dîrokê de, ji ber ku hertim mafê rewşa û berheqê gelê Kurd jê hatiye standin û tu car welatek serbixwe nebûye, lewra derfeta xwendin û nivîsîn bi zimanê Kurdî jî nebûye. Lê tiştê ku zimanê Kurdî heya roja îro aniye, dengbêjiya Kurdî bûye.

Mixabin beşeke mezin ji muzîka Kurdî ji hêla dewletên dagirker ve hatiye dizîn û ji xwe re kirine mal.

Li Rojhilatê Kurdistanê, deverên kurmançîaxiv jî weke hemû deverên din ên Rojhilatê Kurdistanê, zext û zora dewleta desthilatdar bi ser de hakim bûye, kultur û kesên ku di xizmeta berjewendiyên wan de bibin, li gor wan normal in, lê kesê/a ku bixwaze ji kultura xwe re xwedî derkeve, "Mufsid fil erz" (fasid û gendelên ser rûyê erdê) tên hesibandin dikevin ber zext û givaşan û heqê wî/ê zindan û mirine e.

Li nêrîna wan de me mafê axavtin bi zimanê xwe heye, lê axavtin ku li gor berjewendiyên wan be.

Xaleke giring di wê derheqê de eva ye ku heke muzîka Kurdî di parên din ên Kurdistanê de qedexe be, di Kurdistana me de ducar qedexe ye, sedema vê çendê jî

sîstema Komara Îslamî ya Îranê ye ku bi siyaseta îslamîbûna xwe li dijî hemû kultur û çand û dilxweşiya gelê Kurd, neteweyên din yê Îranê û heta gelê Fars jî disekine.

Lê ev dijiwariya bi xwe jî çend qonax in. Qonaxa yekem eva ye ku di destpêka Şoreşa gelên Îranê de bi yekcarî biryara herambûn û qedexebûna muzîkê hate dan. Qonaxa duyem jî eva ye ku piştî heyamekê sînahiyek pir kêr ji bo hezkerên muzîkê tê xuyakirin ku bi tenê li ser Xwedê û Pêxember û Îmaman stran dikare were gotin, ku jêre dibêjin stranbêjiya olî.

Qonaxa sêyem eva ye ku starnbêjiya olî jî li gor hemû filter û sansorên xwe ji bo neteweyên Îranê, zehmet, dijiwarî û astengên xwe hene, yanî divêt zimanê te yê sereke Farsî be. Bo mînak, di CD yan kasêtekê de jî, divêt %80 zimanê Farsî be (helbet kasetek ku orgînal be).

Mixabin di nava gelên Îranê de, gelê Kurd di qonaxa yekem de dijî û di nava qonaxa yekem de jî, Kurdên Kurmancî pitir bê maf mane.

Heke em ji muzîka Kurmancî li Kurdistana Turkiyê binêrin, em dibînin ku muzîka Kurdî û Turkî pir nêzîkî hev e. Yan di Îranê de, muzîka Soranî û Farsî nêzî hev e, lêbelê rengê muzîka Kurmancî û amûr û alavên wê tevî muzîka Farsî ferq û cudahiyeke yekcar zaf heye, ev yeka ne tiştê ecêb e, ji ber ku em neteweyek cuda ne û tevî çand û kulturek cuda. Lê mixabin ev yeka jî bi xwe pirsgirêkek e li ser rêya



muzîka Kurmancî.

Çaxê ku em têde dijîn, dema teknîk û internetê ye û însan bi hêsaniyê dikare hemû çand û zimanan li nêzîkî ve bişopîne. Bo mînak, televîzyon û setelayt, ev yek dikare bandora kultura li ser hevdu pêk bîne. Lê ne bi vê wateyê ku kulturk ji holê rabe. Mixabin em yê ketine bin desthilata sîstemekê ku xalên ku di kultura me de nêzîkî kultura wan bin, ji bo xwe dikin mal û yên ku ji wan dûr bin divêt ji holê rabin, lêbelê li gor dema îro, gerek em hişyar bin, muzîka me jî xalek e ji hemû deb û edetên çanda me, stran û muzîk derbasî qonaxek nû bûne, medya Kurdî îro ji hemû deman baştir û pêşkevîtir bûye û dê baştir jî bibe televîzyona "TISHK" ku behemê ked û xuhdana sala û bi hezaran şehîdan e, îro hêviyek ji bo hemû Kurdan û tîrêjek ji bo derbirîna bîr û bawerî û hestên azadîxwazî ku bi salan di dilê mirovên dilsoj û qehreman de mabû û pencereyek e ji bo ku ji xwe û muzîka xwe bi awayekî zanistî, xwedî derkevin, bi taybet muzîkvan û stranbêjên me yên genc.

Bi hêviya roja serkevîtinê.

Daxuyaniya Navenda Nivîskarên Kurdistana Îranê, Bi Hinceta Zextên Komara Îslamî Ya Îranê Bo Ser Çalakên Kurd

Di daxuyaniyê de, Navenda Nivîskarên Kurdistana Îranê hevdem tevî mehkûmkirina riiftara berpîrs û karbidestên rejîma Komara Îslamî ya Îranê tevî Kurdên çalak û xwedî bîr û rayên cuda, ji hemû tekoşer û navendên mirovhez dixwaze ku li hember zext, givaş û êrîşên rejîmê li dijî ronakbîran, bisekinin.

Deqa daxuyaniya han bi vî awayî ye: Komeleyên azadîxwaz ên Kurdistanê! Ronakbîr û tekoşerên nava tevgera ronakbîrî ya Kurdistana!

Navend û rêxistinên mirovhez Her wek hûn agehdar in, zor û zextên hêzên dijî azadiyê yê Komara Îslamî ya Îranê li ser ronakbîr, rojnamevan, çalakên çandî û hunerî û endamên Navenda Nivîskarên Kurdistana, heta diçe zêde û zêdetir dibe û her di wan 3 heftiyên borî de, çendîn kes ji wan cudabîrên han ji nû ve ketine ber lêpîrsîn û hikmên domdirêj û nemirovane bi ser wan de hatiye sepandin



ku weke mînak em dikarin qala **Aso Salih, Seîd Saîdî, Mensûr Teyfûrî, Îclal Qewamî û Ednan Hesenpûr** ku berbirûyê xeterekî mezin hatine.

Ewa di demekê de ye ku berê jî rojnamevanên heftînameya daxistî ya "Peyam e Merdum" yê bi navên **Îrec Ebadî, Cemşîd Wezirî û Kawe**

Husênpenahî ji dadgehên Komara dijî azadiyê re hatine gazîkirin. Buxtanên bixeter ên ji hin kes ji wan birêzane hatine kirin, ji me re didin kifşê ku karbidestên wê rejîmê hez dikin ku bi hemû hêz û şiyana xwe ber bi ji holê rakirin û jinavbirina cudabîrên Kurd biçin. Ji ber vê çendê ye jî ku heke li hember wan pîlanên rejîmê de bêdengî were parastin, dê tirajîdî û bûyerên mezin û dilêşîn werin afirandin.

Em weke Navenda Nivîskarên Kurdistana Îranê hevdem tevî mehkûmkirina wan hewlên dijî mirov yê berpîrsên rejîmê, daxwazê ji hemû aliyan dikin ku bi êşkerekirina kiryarên metirsîdar ên dijminên azadiyê û girtina helwesteke qahîm û tund, zextê li ser rejîmê bikin da ku pêşiya wan bûyerên metirsîdar yê ku li dijî ronakbîr û cudabîrên Kurd tên kirinê, were girtin.

Navenda Nivîskarên Kurd
24.06.2007

Çiqas Li Me Tê Mirin!

Besam Mistefa

Li paş asoyên şîn dinihêrim, çendîn kurt û dirêje ev jîna me.

Niha, bêriya ken û girî dikim. Du gav in, tenê du gav in û jiyana destpê dike. Niha, bêriya wî zarokê ku di bin siya diwarê mala me de, di havîna germa şewatkar de mêraniya xwe ezmûn dikir, dikim.

Li hewşê, dara tûyan hebû. Di bin darê de, kalikê min yê rûboz û xweşik, bi çerxê xwe yê pirteqalî û dirêj çixare ji çixarê vêdixist. Di her hilmekê de, zozanê welatê li paş şîn asoyan raketî, şintir dibû. Bêriyanên çavkilkirî di nav dûyê wî de, şîn dihatin.

Em zarok bûn dema ku ew mir. Dotmama min Menîce(kalikê min jêre digot Meno) pora serê xwe anî xwarê. Apê Xelîl ku tucarî nedîçû şîniyan, di nivê odê de-ciyê ku kalikê min lê hatibû dirêjkirin-li qelêvîzka rûniştibû û digiriya. Di nav giriyê xwe de digot: Ew henûn bû! Em zarok bûn, me nizanibû mirin çî ye û çima merivên me wisa digirîn. Giriye me nedihat. Yekî em agahdar kirin û got: Bigirîn! Kalikê we mir!

Beriya kalikê me bimire, bavê wî jî miribû û beriya wî jî kalikê wî. Belê, sistêma herî rêkûpêk û dirust mirin bû. Mirina ku piştî jiyane cî digirt, lê ne di nava wê, anjî beriya wê!

Ji xwere biramin: kalikê min heta mirina xwe jî bêhêvî nebû. Weke gelekên dîtir, ji ber sitema Tirkan piştî şoreşa Şêx Seîd reviyabû hatibû binxetê û li wir a bicî bûbû. Baş tê bîra min, dema ew di nava odê de dimeşiya, çixareya wî jî pêre, gavên xwe dijmartin: Gavek na dido na sisê...ta dighişte dehan. Disekinî, lingê xwe yê rastê heta jê dihat li erdê dixist û digot: Ha li vir kevirek heye, di bin de zêr veşartîye! Bost bi bost, axa welat di bîra wî de bû, qet bê hêvî nedibû. Venegeriya welêt, lê bêhêvî nebû.

Bêhêvîbûn mirin e.

Mirin ne yek e, renge reng e: Yên ku mirî tîn dunyayê, yên ku di jiyane de dimirin, û yên ku piştî jiyane dimirin! Mirina here biêş û dijwar mirina dil e....mirina azwer, hêvî û baweriyê ye..dûrketina ji heriya pêşîn, têdaçûna di nav hizr û raman û teore û bîrdoziyên cuda-cuda de ye.

Mirin ne ewe mirovek ji xwe re heta hetayê raze! Mirin, jibîrkirina gewherê eslî û pêşin yê mirov e...veşartina hest û nestên mirovî yên xurû û sade ye: Ev çî cil û berg û derman û bihn û derew û fen û xap û hîlebazî ne? Ev çî bajar û hasin û diwarên bilind û kolan û avahî û ronahî û çemênto ye? Ev çî reng mirin e!? Çî mirî ne li van kolanan digerin?!

Du gav in, tenê du gav û jiyana destpê dike. Lêbelê, mirin çiqas li me tê! Êdî em hişk dibin ji heriya xwe dîr dikevin..mirin e eva ku em dijîn.... Ka were kalo em çixareyekê bikşînin!

27'emîn Salvegera Destbikarbûna Radyo Dengê Kurdistanê Îranê Pîroz Be

Rehîm Reşîdî

W: Azad Kurdî

Li 27'ê meha Cozerdan (17'ê Hezîran)ja hemû salekê, xelkê mafxwaz yê Kurdistanê bi giştî û nemaze endam û alîgirên PDK Îranê, bîranîna avakirina Dengê Kurdistanê Îranê bi hêja û qedirgiranî ve pîroz dikin. Roja

27'ê Cozerdana sala 1359'ê Rojî(17.06.1980), di demekê de Radyo Dengê Kurdistanê Îranê bi peyama rêberê leheng û navdar yê kurd, **Dr. Ebdulrehman Qasimlo** dest bi xebatê kir ku têkoşîna tim partî û rêxistinên siyasî ên demokrat û pêşverûxwaz ên Kurdistanê jî bo peydakirina rêya çareserîya astîxwazane bona çareserîkirina doza siyasî ya gelê Kurd li Kurdistanê Rojhilat, bi sedema siyaseta şerxwazî û fitne afirandina rayedarên taze bi desthilat gihiştî yê Welayeta Feqîh tevî têkçûnê berbirû bibû.

Xomeynî bi êşkere li dijî xelkê azadîxwaz yê Kurd fermana cîhadê dabû, fermanek ku rewş û delfiveya kuştin û qirkirina berfireh ya xelkê bêguneh û sivil yê Kurdistanê ji sipahiyan azadîkuj re bi tevahî pêk anîbû. Di rastî de, serbazên eniya nezani û kevneperestiyê bi pêşgirtina siyaseta kuştina xelkê sivil, wêrankirina gundan û bomebarankirina berfireh ya bajarên Kurdistanê, her zû selimandin ku ji bo gelên Îranê ên bêpar ji azadî û mafê berheq, tu mizgînî û xebereke xweş ninin. Siyasetek ku serbarê bê encambûnê, mixabin heya niha jî her didome.

Di rewşeke wiha de, Radyo Dengê Kurdistanê Îranê wekî pêwîstiyekî dîrokî ji bo êşkerekirina qelafeta bixwîn û birîndar ya Kurdistanê û xebat û berxwedana rewşa û berheq ya xortên gelê Kurd ji man û hebûna xwe û ax û xelkê xwe, ji aliyekî din ve jî bo kifşkirin û şermazarkirina naveroka şerxwazî û dijiminkariya karbîdestên desthilatdar ên Îslamî li dijî xelkê Kurdistanê, bi îmkaneke pir kêr, lê bi stûgirtina resalet û erkeke pîroz û dîrokî pê danî qada xebat û têkoşîna ragihandina şoreşgerane ya Kurdistanê.

Radyo Dengê Kurdistanê Îranê di wê rewşa dijwar de, bi hildana sela û banga azadîxwazî û belavkirina nûçeyên derbarê Kurd û Kurdistanê, derfeteke zêrîn û girîng berbi rûyê azadîxwazên welatê me vekir.

Di rastî de, Radyo Dengê Kurdistanê Îranê, herçiqas di warê hêza kar, îmkanatên malî(diravî) û teknîkî, bi awayekî xizan û destkurt têkoşîna xwe ya serbilindane dest pê kir, lê ji ber ku hêzek neteweyî û demokrasîxwaz ya berpirsiyar di pişt de rawestabû û dirûsmên wê partiyê jî rengvedana rastîna ya xwestekên mafxwazane yê welatparêzên welat bû, her pir zû bala civatên milyon ên xelkê Kurdistan bo aliyê xwe rakîşand. Bi sedema rastbêjî û tekoşîna azadîxwazane ya wê radyoyê, hevdem ji ber rêveberî û xemxoriya **Dr. Sadiq Şerefkendî** ku gellek salan berpirsiyarê radyoyê bûye, bi tevahî bûye cihê bawerî û hitbara hemû xelkê welatê me.

Dengê dilê ye Kurdistanê Îranê, di heyama temenê teji jî serbilindî yê xebata xwe de pir evraz û nişiv bezandin, dijwarî, kosp û asteng hatine ser rêya wê, lê herdem bi sedema hişyariya siyasetrêjên wê û fidakarî û hest bi berpirsiyarîkirina xebatkarên ve radyoyê, di rewşên herî dijwar û tund de, heya di bin êrişa bombe û katyûşayan de jî bo demekê ji xebatê ne sekiniye.

Aşkera ye ku ji destpêka karê ve radyoyê heta niha, rayedarên rejîma Îranê ji bo kîpîrîn, fetisandin û bédengkirina dengê rastbêjî û cihê hitbara xelkê Kurdistanê, cehd û hewla girtin û kîpîrîna vî dengê zelal dane û didin. Tenê eva bes e ku em bizanibin, di heyamê tekoşana xwe ya bêrawestiyana de, bêtirî 20 caran, bi naçarî cihê Radyo Dengê Kurdistanê Îranê hatiye guherîn. Lê wekî em dizanin, tenê 2 caran ku ew jî sedemek derekî hebûye û li vir ne hewceye ku em qala wan bikin, dengê wê hatiye kîpîrîn.

Ji tu kesê jî veşartî nîne ku Dengê Kurdistanê Îranê di heyamê tekoşîna xwe de, seba rastbêjî û berçavgirtina xwestek û baweriyên civaka Kurdewarî yê bûye heval û hemdemê hertimî yê xelkê Kurdistanê. Her wiha li mal, zevî, rez û baxan, dukan û bazaran û di gotineke kin de, li cihê kar û jiyane heval û hemdemê pîraniya tex û qatên xelkê Kurdistanê ye.

"TISHK TV" bi hêja û rêzgirtinê ji xebata mandînenasane ya Dengê Kurdistanê Îranê dinêre û tevî bilind nixandina xebata pir serfirazane a vî dengê neteweyî, 27'emîn salvegera avakirina ve radyoyê ji gişt azadîxwazên welatê me bi giştî û nemaze xebatkar û rêveberên wê dike û destegulên wefa, emegdarî û mandînenasiyê bi hurmet ve li berçêla wan dide.



Berga Yekem Ya “Albûma Şehîdan” Çap û Belav Bû



Di wan rojan de, Komîsyona Civakî ya PDK Îranê di xebateke pîroz de û ji bo rêzgirtin û herîm zindîragirtina bir û rêya Şehîdên Kurdistanê, berga yekem a “Albûma Şehîdan”, çap û belav kir.

Di vê albûmê de ku di pêxema gotinên pir biha yên Serkarwanê Şehîdên Demokrat Dr. Qasimlo de ku dibêje “Her gelek ku azadiyê bixwaze, divêt ku buhaya vê azadiyê jî bide” û “Baştirin xelat ji Şehîdan re domandina rêya wan e”, dikeve ber çavê xwendevanan, nav û wênayên şehîdên Kurdistanê hatiye weşandin.

Ev albûme pêkhatiya ji beşên weke destpêk,

jiyanameya Pêşewayê nemir Qazî Mihemed, Şehîd Dr. Qasimlo, Şehîd Dr. Şerefkendi, wêne û pênasayên Şehîdên Komîteyên Mehabad, Bokan, Serdeşt, Bane û Rebetê.

Em jî weke malbata weşana Agirî, destxweşiyê dibêjin Kadro, Pêşmerge û berpîrsên Komîsyona Civakî ya PDK Îranê, seba vî karê wan ê pîroz û hêviya serkevtinê di kar û xebata wan re dikin ji bo weşandina bergên din yên “Albûma Şehîdan”.

Hêjayî gotinê ye ku ji aliyê Komîsyona Civakî ya PDK Îranê ve, hebek ji vê albûmê pêşkêşî pirtûkxaneyê Desteya Weşana Agirî, hatiye kirin.

Orhan Dogan Jiyana Xwe Ji Dest Da



Parlamentêrê DEP’ê yê berê û berbijarê Parlamentoyê yê serbixwe Orhan Dogan di encama kirîza dil de, roja îne, 29’ê Hezîrana 2007’an jiyana xwe ji dest da.

Orhan Dogan ji bo ku beşdarî Festîvala Bazîdê ya çandî û hunerî bibe, çûbû Bazîdê. Li wir di dema axaftinekê de li ser sehneyê, kirîza dil derbas kiribû. Doktorên wî gotibûn, ew dereng gihandibûn nexweşaneyê.

Hêjayî gotinê ye ku Orhan Dogan di sala 1955’an de, li Kerborana Mêrdînê ji dayîk bûbû.

Desteya Weşana Agirî behî û sersaxiyê ji neteweya Kurd û nemaze malbata nemir Orhan Dogan dike.

Li Kurdistanê Di Du Salan De, 2043 Keç Hatin Sinetkirin

Şandeke rêxistina Wadiyê ya Almaniyê digel rêvebira şaxa Hewlêrê ya rêxistina Wadiyê, **Çimen Salih**, di roja 23.06.2007’an serdana Buroya Herêmê ji bo Kar û barên Jinan kir û bi Wezîra Herêmê ya ji bo Kar û barên Jinan re, **Dr. Cînan Qasim** hevdiîn pêk anî. Di hevdiîtinê de li ser rewşa jinên gundên Kurdistanê gotûbêj hate kirin.

Rêvebira şaxê Hewlêrê ya rêxistina Wadiyê, Çimen Salih bal kişand ser sinetkirina keçan û aşkere jî kir ku di navbera salên 2005-2007’an de, di 112 gundên Kurdistanê de, 2043 keç hatine sinetkirin.

Çavkanî: **Wikipediya Kurdi**



Şimtî Dermanê Romatîzmê



Li ser wan mifahên ku Şimtî(zebeş) bo mirov heye, pişpor dibêjin şimtî li dema xwarinê de mîdê mirov sivik û riviye mirov jî hênîk dike, mîveyek terr e ku tînîtiya mirov jî dişkine. Herwiha givaşê bo paldana mîzê tîne. Serbarê wê ku bo romatîzmê baş e, herwiha mirov ji nesaxiya tayfoydê jî diparêze.

Piştî encamdana çend vekolînan derket ku şimtî bi vitamîna **C** gellek dewlemend e. Lê di vitamîna **A** de hejar e. 90-%93 av e, 6-%8 şekir e. Hinek jî Nikotîng, Fosfor, Putasiyom û kolor têde ye. Dindikên wê jî ku xwarinek bi sûd e pêkhatiya jî %43 rûn, %15.7 şekir û %27 Porotiîn.

Lewre ya baş eve ku her danekê piştî nan xwarinê mirov Şimtîyê bixwet.

Çavkanî: **Kurdistan TV**

